



Ҳеч бир фан математикашмай туриб тақомилига ета олмайди.
Леонардо да Винчи

ЭМПИРИК ИҚТИСОДИЙ ТАДҚИҚОТЛАРДА МАТЕМАТИК МЕТОДЛАРНИ ҚЎЛЛАШ

Radjapbay Dusmuratov,

Toшкент давлат иқтисодиёт университети, Молиявий таҳлил ва аудит кафедраси профессори, и.ф.д., «Ўзбекистон Олий таълими аълочиси», Email: r.dusmuratov@tsue.uz

APPLICATION OF MATHEMATICAL METHODS IN EMPIRICAL ECONOMIC RESEARCH

Radjapbay Dusmuratov,

Tashkent State University of Economics, Doctor of Economic Sciences, Professor of the Department of Financial Analysis and Audit, "Excellence of Higher Education of Uzbekistan", Email:r.dusmuratov@tsue.uz

JEL Classification:M1,M4,M45

Аннотация. Мазкур мақола иқтисодий тадқиқотлар методологияси мухим билиш методларидан – шаклан ифодалаш ва математикаштиришининг мазмун-моҳияти, аҳамияти ва туркумлари очиб берилган. Хусусан, шакллаштириши амалга ошириши босқичлари ва мантиқий шакллантириши шартлари; математикаштириши методининг туркумланиши ва иқтисодий билимларни математикаштириши босқичлари тавсия этилган. Интеграллашган билим соҳаси ва иқтисодий тадқиқотларнинг ўзига хос методи – эконометрика мазмуни ёритилган; уни иқтисодий тадқиқот методи сифатидаги хусусиятлари очиб берилган; эконометрик моделлаштириши услубий хусусиятлари; математик экспериментнинг иқтисодий тадқиқот методи сифатидаги моҳияти, иқтисодий тадқиқотларда математик методларни кўллашнинг афзалликлари ва камчиликлари очиб берилган ҳамда уларни кўллаш бўйича тавсиялар келтирилган.

Abstract. This article reveals the

essence, importance and categories of one of the important knowledge methods of economic research methodology - formal representation and mathematization. In particular, the stages of implementation of formation and conditions of logical formation; classification of mathematization method and steps of mathematization of economic knowledge are recommended. The content of the integrated field of knowledge and the unique method of economic research - econometrics; its characteristics as an economic research method are revealed; methodological features of econometric modeling; the essence of the mathematical experiment as a method of economic research, the advantages and disadvantages of using mathematical methods in economic research are revealed, and recommendations for their use are given.

Калим сўзлар: иқтисодий тадқиқот, шаклан ифода, математикаштириши, метрик ва нометрик математикаштириши, иқтисодий жараёнлар, математик моделлаштириши, эконометрика, эконометрик модел,

математик эксперимент.

Key words: *economic research, formal expression, mathematization, metric and nonmetric mathematization, economic processes, mathematical modeling, econometrics, econometric model, mathematical experiment.*

Кириш. Янги Ўзбекистон тараққиётининг ҳозирги босқичида иқтисодий ўсишга эришиш ва аҳоли турмуш сифатини оширишнинг асосий йўналиши илм-фанни ва инновация фаолиятини ривожлантириш, инновацион технологиялар, маҳсулотлар ҳамда хизматлар кўламини кенгайтириш ҳисобланади. Дарҳақиқат, Ўзбекистон Республикаси Президенти Шавкат Мирзиёев томонидан: «*Бир ҳақиқат ҳаммамизга маълум: илм ва изланиш бўлмаган жойда ҳеч қандай ривожланиши, юксалиши ва умуман, бирор-бир соҳанинг келажаги бўлмайди*»[1], деб алоҳида таъкидланди.

Албатта, бу фикр исбот ва изоҳ талаб қилмайдиган аксиома(постулат)дир. Лекин, ривожланиш ва юксалишни таъминлайдиган илмий изланишлар самараси **иқтисодий тадқиқотларнинг замонавий услубларини пухта ўзлаштиришини талаб этмоқда.**

Инсон ўзини ўраб турган олам сирларини, хусусан унда кечаётган жараёнлар ва содир бўлаётган ҳодисаларни тадқиқ қилишда маълум қийинчликлар ҳамда муаммолар билан тўқнашади. Кўпинча унинг ақл-заковати табиат ва жамият тақдим этаётган айрим мураккаб вазифаларни ҳал этишга ожизлик қиласди. Лекин, одамзод ўзининг тадқиқ ва таҳқиқ фаолияти давомида бир қанча муҳим билиш методларини кашф этиб, улар ёрдамида тадқиқот жараёнлари осонлаштирилган ва илм-фанга мавхум бўлган нарсаларни ихтиро қилишда

оламшумул натижаларга эришган. Бундай энг муҳим билиш методларидан иккитаси **шаклан ифодалаши** ва математикалаштириши ҳисобланади.

А.М. Ореховнинг таърифига кўра: «**Шаклан ифодалаши** – бу тадқиқ қилинаётган ҳодиса ёки жараён мазмунини шаклга келтириши ва акс эттириши, ҳамда ҳодиса (ёки жараён) маркибидаги айрим элементларга абстракт белги(символ)лар бернишга асосланган билиш метод; шаклга келтириши ва акс эттириши натижалари ҳодиса ёки жараённинг мазмuni тўғрисида **янги билимлар ва ахборотлар олиши имконини беради**»[3].

Шу ўринда мазмун ва шакл тушунчаларининг мазмун-моҳиятига батафсилоқ тўхталсак. «**Мазмун ва шакл – фалсафий тушунчалар.** Мазмун нарсаларни айнан шу нарса сифатида ифодаловчи муҳим элемент ва ўзгаришиларнинг ийгиидисидир. Шакл мазмуннинг мавжудлик усулини, ички тузилишини ифодалайди. Объектив оламда нарса ва ҳодисаларга оид бўлмаган соф мазмун ҳам, соф шакл ҳам йўқ. Муайян мазмун ҳамиша муайян шаклда ифодаланганидек, муайян шакл ҳам муайян мазмунга эгадир»[5].

Демак, кенг маънода шаклан ифода деганда предмет ёки жараён шаклини унинг мазмунидан келиб чиқсан ҳолда ифодалаш тушунилади.

Шаклан ифодалашнинг бир қанча асосий босқичлари мавжуд. Улардан **биричиси** табиий, яъни кундалик, мулоқот тили негизида шаклга келтиришdir.

Шаклан ифодалашнинг кейинги, иккинчи босқичи илмий билимларни мантиқан шаклга келтириш жараёни ҳисобланади. Айнан илмий тадқиқотлар натижасида олинган билимларни мантиқан шаклга келтириш ҳар хил

тадқиқотчилар ўртасидаги ўзаро алоқаларни юқори даражага күтаришни таъминлайди.

Мантиқан шакллантириш, яъни математик мантиқ қоидалари асосида шакллантириш, бир қатор шартлар бажарилишини талаб этади:

1) шакллантирилайдиган тизимнинг «алифбоси»ни яратиш;

2) шакллантириш вужудга келадиган «грамматика» қоидаларини, мантиқий хулоса қоидаларини ҳам қўшган холда, ишлаб чикиш;

3) асосий ва асосий бўлмаган гапларни ажратиш, яъни кейинчалик мазкур назариянинг теоремаси чиқариладиган аксиомаларни ажратиб олиш.

Сўнгги, учинчи шарт мантиқий шаклга келтиришининг вазифасига муҳим қўшимча киритиб, унга мувофиқ назарияни мантиқий шаклга келтиришнинг босқичларидан бири аксиомалаштириш бўлиши лозим.

Австриялик математик ва мантиқшунос К. Геделнинг таъбири билан айтганда: «*фан олдин атамаларни, ундан кейин символларни, ундан кейин эса маҳсус тилларни яратишга ўтади*»[3].

Демак, мантиқий шакллантириш – мураккаб кўп погонали жараён. Қоидага кўра, шаклга келтиришнинг бундай тури хеч қачон мутлақ ёки тўлиқ бўлмайди. Илмий билимларни мутлақ мантиқий шаклга солиш йўлидаги асосий тўсиқлардан бири – тўлиқлик ва зиддиятсизлик талабларининг «Гедел теоремаси»¹да келтирилган далиллаш билан мос келмаслиги ҳисобланади. Ушбу теорема шаклга келтирилган назариянинг мутлақ тўлиқлиги фақат унда назариянинг ўзи доирасида исботлаб бўлмайдиган

фикрлар мавжудлигида бўлиши мумкин. Агар назариядаги барча фикрлар назариянинг ўзининг доирасида исботланадиган бўлса, у холда назариянинг ўзи тўлиқ бўла олмайди.

Мантиқ ва тил ёрдамида шаклга келтиришдан ташқари, шаклан ифодаланган билимлар сифатини яхшилашнинг яна битта, жуда самарали ва анча кенгроқ тарқалган методи – бу уларни *математикаштириши*.

Математикаштириш илмий (ва бошқа ҳар қандай) билимларни шаклан ифодалашнинг маҳсус методи бўлиб, ўлчаш, таққослаш ва ҳисоблашларга асосланган.

Математикаштиришнинг мантиқий-гносеологик мазмуни ҳам, тахминан шаклга келтириш методиникига ўхшаш: *объектнинг шаклан тузилмасини ажратиб кўрсатиш ва унинг билан иши олиб бории*. Математикаштирища бундай шаклга келтириш, биринчи навбатда микдор, сонли амаллар: ўлчаш, таққослаш ва ҳисоблаш ёрдамида амалга оширилади.

Математикаштиришнинг иккита асосий методи мавжуд: *метрик математикаштириши* (бу метод ўлчаш, таққослаш ва ҳисоблаш амалларига асосланган, классик ёндашув ҳисобланади); *номертик математикаштириши* (бу метод математик билимларни бошқа фанга ўтказишга асосланган ёндашув).

Метрик математикаштириши – бу фаннинг у ёки бу соҳасига ўлчаш, таққослаш ва ҳисоблаш амалларини татбиқ этиш воситасида математикаштиришдан иборат. Бу метод жуда кенг тарқалган ва математикаштиришнинг кенг қўлланиладиган тури ҳисобланади. Ушбу метод физика, астрономия, кимё ва деярли барча табиий фанларда, ижтимоий

¹ Гедель К. (1906-1978) - австриялик математик ва мантиқшунос.

фанлардан эса тарих, психология ва айрим бошқа фанларда қўлланилади.

Нометрик математикалаштириши методи метрик математикалаштиришга караганда камроқ қўлланилади. Унинг асосий принципи математик билимларни тузилмаларни математик моделлаштириш ёрдамида илмий билимнинг қандайдир мазмун соҳасига кўчиришдан иборат.

Г.И. Рузавин таъкидлашича: «нометрик моделлар ўрганилаётган тизимларнинг хилма-хил тузилмавий тавсифлари ва муносабатларини тадқиқ қиласиди»[4].

Нометрик математикалаштиришга қандайдир фанда қуидаги математик бўлимлардан фойдаланиш мисол бўлиши мумкин: гурӯхлар назарияси, графалар назарияси, тармоқ моделлари ва шу кабилар. Ижтимоий фанлар орасида ушбу метод психология ва социологияда кўпроқ

қўлланилади.

Методлар ва материаллар. Тадқиқот жараёнида аввало, фалсафа даражасидаги умумметодологик асос сифатида диалектика, хусусан гносеология; умумилмий методлардан: илмий тафаккур, анализ ва синтез, индукция ва дедукция, абстракт-мантиқий методлар, қиёслаш, тафаккурдаги эксперимент каби назарий методлар; кузатиш, ўлчаш, қиёслаш каби эмпирик методлар қўлланилди.

Шаклан ва математик ифодалаш тўғрисида умумий тушунчага эга бўлганимиздан сўнг, бевосита **иқтисодий билимларни шаклан ва математик ифодалаш** масалаларига ўтишимиз мумкин.

Иқтисодий билимларни математикалаштириш асосан тўртта йўналишга бўлинади (1-расм).



1-расм. Иқтисодий билимларни математикалаштиришнинг асосий йўналишлари

Ушбу йўналишларни батафсилроқ кўриб чиқамиз:

1) *биринчиси* – эконометрика йўналиши. Ушбу йўналишнинг асосий вазифаси иқтисодиётга статистик ўлчаш ва маълумотларни тўплаш принципларини татбиқ этиш, тадқиқ қилинаётган воқеликни сонларда ифодалаш ва ушбу ифодалашнинг ўлчовлари ҳамда чегараларини топишдан иборат;

2) *иккинчи йўналиши* – иқтисодий воқеликнинг ҳар хил математик моделларини тузишдан иборат. Таъкидлаш жоизки, бу математик методнинг стратегик йўналиши ҳисобланади. Бунда тадқиқ қилинаётган ҳодисалар ва жараёнларнинг шакл-миқдор ифодасидаги математик моделлари тузилади. Моделлаштириш ҳодисалар ва жараёнларни ўрганишга тизимли ёндашувга асосланиб, унинг

мақсади тизимлар тузилмаси ва функциясини таҳлил қилишдан иборат. Ушбу тизимлар ва уларнинг моделлари ҳар хил мураккабликда бўлиб, алоҳида ҳодисалар моделларидан тортиб то жараёнлар моделларига қадар, объектив воқеликнинг кенг соҳасини камраб олиши мумкин.

3) учинчи йўналиши амалий иқтисодиётга математик эксперимент моделини татбиқ этиш билан боғлиқ. Бу йўналиш иқтисодиёт фанларида математик моделлаштиришни тез ишлайдиган компьютерларда моделлар устида кўп марта амалга ошириладиган эксперимент сифатида қўллашга асосланган. Бу метод иқтисодий тадқиқотларда назарий (математик) ва эмпирик (эксперимент) методларни бирлаштиришга имкон яратади ва шуниси билан иқтисодий тадқиқотлардаги одатий, оддий эмпирик методлар (хусусан, иқтисодий эксперимент методи)нинг ўрнини босади;

4) ва ниҳоят, тўртинчи йўналиши – иқтисодий билимларни нометрик математикаштириши бўлиб, у иқтисодиёт назарияси ва амалиётига сифат математикасининг принципларини татбиқ қилишга асосланган.

Хозирги вақтда, хусусан иқтисодиётни рақамлаштириш шароитлари иқтисодиёт фанида математик методга талабни янада кучайтирмоқда. Иқтисодий-математик методларнинг тараққий этиши туфайли иқтисодчилар янги иқтисодий билимларни эгалламоқдалар. Шу ўринда замонавий иқтисодий-математик методларни ривожлантиришнинг бир неча асосий йўлларини кўрсатиш мумкин.

Иқтисодий жараёнларни математик моделлаштириши ўзининг моҳиятига кўра хўжалик жараёнларини

тадқиқ қилишга математикани инструменти ҳисобланади.

Мақбул(оптималь) методлари ва методологияси мақбуллик(оптимальлик) принципларини иқтисодий амалиётга жорий этиш муаммоси билан шуғулланади. Бу ерда иқтисодий мақбуллик(оптимум) мухим ўрин тутади. Иқтисодий мақбуллик(оптимум) – иқтисодий тизимнинг барча мумкин бўлганлари орасидаги энг яхши ҳолати ҳисобланади.

Хўш, бундай ҳолатга қандай эришилади?

*Иқтисодий мақбуллик(оптимум)*га интилиш *мақбул(оптималь) бошқаршишининг асосий ўлчами сифатида* қаралади. Бундай ҳолатни жорий этиш бошқарув субъекти каби, у бошқарадиган обьектига ҳам боғлиқ бўлади. Субъектда мақбулликнинг шаклан ва математик ифодаси бошқарувнинг мазмунига мос келиши лозим. Акс ҳолда, бошқарув ҳамиша номақбул бўлади ва мақбуллаштиришнинг математик воситалари тўлиғича бефойда ҳисобланади.

Эконометрика – бу ўзида, энг камида, учта фанни: иқтисодиёт назарияси, ижтимоий-иктисодий статистика, шунингдек математик-статистика ва эҳтимоллар назариясини ўйғунлаштира оладиган фанлараро йўналиш ҳисобланади. Эконометрика аниқ иқтисодий вазифаларни ҳал этиш ва унинг натижаларини кейинчалик хўжалик фаолиятига жорий этишни ўз олдига асосий вазифа қилиб қўяди.

Иқтисодий кибернетика иқтисодиётнинг тизимли таҳлилини, иқтисодий ахборотлар назариясини, иқтисодий семиотикани, бошқарувчи тизим назариясини ва шу кабиларни ўз ичига олади. Иқтисодий кибернетиканинг



асосий методи «қора ящик» методи бўлиб, иқтисодий объектни фақат иқтисодий ахборотларнинг мазкур объектга кириши ва ундан чиқиши тўғрисидаги аниқ маълумотлар билан моделлаштиришни назарда тутади, аммо бунда иқтисодчи-тадқиқотчи иқтисодий объектнинг ўзининг тузилмаси тўғрисида ҳеч қандай ахборотларга эга бўлмайди.

Иқтисодиёт илмида замонавий математик метод ривожланишининг якунларини умумлаштириб, қуйидаги қизиқ фактга эътибор қаратиш керак бўлади: Нобел мукофотига сазавор бўлган барча иқтисодчилардан, иқтисодий-математик методлар ва моделларни ривожлантиришга қўшган ҳиссаси учун Нобел мукофоти лауреати бўлганлари катта улушни ташкил этган.

«Эконометрика (юн. oikonomike – уй хўжалигини юртиш санъати ва ...метрия), эконометрика – иқтисодий жараёнларни таҳлил қилиш, иқтисодий ахборотларга ишлов беришнинг математик ва иқтисодий-статистик усусларини ва моделларини ишлаб чиқиш ва қўллаш билан шуғулланадиган фан; Э. иқтисодий ҳодиса ва жараёнларнинг аниқ миқдорий қонуниятлари ва ўзаро алоқаларини математик ва статистик усувлари, моделлар ёрдамида ўрганади. Э.када қўлланиладиган моделлар ёрдами билан статистика, прогноз ва режа маълумотлар асосида миқдорий натижалар олинади. Э.нинг пайдо бўлиши иқтисодий таҳлиллар ва тахминлаш учун иқтисодий статистик усувлар ва йўл-йўриқларнинг зарурати билан боғлиқ»[6].

Бу атамага С.А.Айвазян томонидан кенг қамровли ва янада аниқроқ таъриф берилган: «Эконометрика – бу: (i) иқтисодиёт назарияси, (ii) математик статистика ва иқтисодий ўлчовлар, (iii) математик-статистик инструментариялар

негизида, иқтисодиёт назариясидан келиб чиқадиган умумий (сифат) қонуниятларни аниқ миқдорий ифодалаш учун мўлжалланган назарий натижалар, методлар ва моделлар мажмуйини бирлаштирадиган мустақил фан»[2].

Натижалар. Шундай қилиб, фикримизча, «Эконометрика» атамасининг бир қанча изоҳлари орасида унинг иқтисодиёт назарияси, иқтисодий ва математик статистика негизига қурилган инструментал фан сифатидаги таърифланиши асосий ҳисобланади. Таърифлардан кўринадики, эконометрика – ўзининг предметида иқтисодиёт назарияси, ижтимоий-иқтисодий статистикани, шунингдек эҳтимоллар назарияси ва математик статистикани уйғулаштирадиган, синтетик фан ҳисобланади. Шу боис, уни ўзлаштириш учун юқорида келтирилган фанлар билиш зарур.

Статистика ва эҳтимоллар назариясининг ҳар иккала тури эконометрикага иқтисодий-математик инструментариялар етказиб беради ва уни тегишли иқтисодий-статистик ахборотлар билан таъминлади. Бу жиҳати бўйича эконометрика бутунлай *холис* (*нейтрал*) ва эҳтиросларсиз фандир. Лекин, эконометрика ва иқтисодиёт назарияси ўртасида мавжуд бўлган ўзаро боғлиқлик тўғрисида сўз юритилганида, ушбу «*холис* (*нейтрал*)лик» ва «эҳтирослизик» йўқолиши мумкин.

Эконометрик тадқиқотларда қўлланиладиган асосий усул эконометрик моделлаштириши ҳисобланади. Бу усул математик ва статистик моделлаштиришининг турларидан бири бўлиб, асосан қуйидаги принципларга таянади:

- 1) бу моделлаштириш жараёнларини ёхуд

прогнозлаши, ёхуд имитациялаши лозим;

2) ҳал этиладиган вазифаларнинг миқёси а профилига қўра эконометрик моделлаштириш инвестициялар, баҳо шаклланиши, молиявий ёки ижтимоий сиёсат ва шунга ўхшаш муаммоларни тадқиқ қилиши лозим;

3) эконометрик модел эндоген ўзгарувчан миқдорларни экзоген ва вақт оралиғида ўзгарувчан миқдорларга боғлиқ ҳолда тушунтириб берши лозим;

эконометрик модел изчилинида спецификацияланиш, дентификацияланиш, идентификацияланиш ва верификацияланиш босқичларидан ўтиши лозим» [2].

Эконометрик модел тузилишининг ўзи уни идентификациялаш билан якунлансада, факат унинг верификацияланиши охир-оқибатда ёхуд унинг тўғрилигини тасдиқлайди, ёхуд ушбу моделни рад этади. Сўнгги ҳолатда иқтисодчи-математикдан янги эконометрик модел тузиш талааб этилади.

Юкорида, энг идеал иқтисодий экспериментларнинг учта туридан бири *иқтисодиётдаги математик эксперимент* эканлиги таъкидланган эди. Энди ушбу экспериментнинг муаммосини ҳам назарий, ҳам методологик жиҳатдан қисқача муҳокама қилишга ҳаракат қиласиз.

Иқтисодиётдаги математик экспериментни аслида иккита жиҳати бўйича талқин қилиш мумкин: бир томондан, бу математик моделлаштиришнинг турларидан бири бўлса, бошқа томондан эса, идеал экспериментнинг маҳсус тури ҳисобланади. Лекин, мазкур тушунчанинг мазмунига аниқлик киритиш учун, унга учинчи жиҳатини ҳам киритиш зарур: математик

эксперимент – бу компьютерда моделлаштиришнинг варианларидан бири.

Математик эксперимент – бу маҳсус идеал эксперимент бўлиб, тез ишлайдиган компьютерларда ва компьютерлар тизимида амалга ошириладиган кўп маротабалик математик моделлаштиришнинг турларидан бири ҳисобланади.

Иқтисодиётдаги математик экспериментга ҳам шунгга ўхшаш таъриф беришимиз мумкин.

Иқтисодиёт фанида математик эксперимент – бу маҳсус идеал иқтисодий эксперимент бўлиб, тез ишлайдиган компьютерларда ва компьютерлар тизимида хўжалик жараёнларини кўп маротабалик математик моделлаштиришнинг турларидан бири сифатида амалга оширилади.

Иқтисодиётда математик экспериментнинг вужудга келиши учун зарур бўлган шарт-шароитлар, биринчидан, иқтисодий билимларни шаклан ва математик ифодалаш, иккинчидан эса, иқтисодий экспериментнинг ўзини шаклга келтиришдан иборат. Сўнгисини вужудга келтирган шарт-шароитлар эса, аёнки, предметли (натурал) иқтисодий экспериментни математик модел шаклига ўtkазиш имконияти ҳисобланади. Бунда математик экспериментдан ўtkazilaётган хўжалик обьектининг ўзи ҳам шаклга келтирилади ва математикалаштирилади.

Иқтисодиётдаги математик экспериментларда хўжалик жараёнларини математик моделлаштиришнинг барча асосий принциплари амал қиласи. Жумладан, натижаларни таҳлил қилиш, талқин қилиш ва уларни иқтисодий фактлар билан таққослаш. Аммо, математик

моделлаштиришдан фарқли ўлароқ, математик эксперимент шу билан якунланмайди.

Бундай экспериментни ўтказиш чоғида математик моделлар билан ишлешнинг афзалиги шундан иборатки, бу ерда битта муайян моделни тадқиқ қилиш билан чеагараланимайди, балки моделларнинг ҳар хил варианatlаридан иборат тўплами таҳлил қилинади. Дастробки модел ўта содда ёки, аксинча, ўта мураккаб эканлиги аниқланиши билан, тадқиқ қилинаётган жараёнларни энг яхши тарзда баён этадиган модел топилмагунича, барча хисоб-китоблар янги модел устида такрорланаверади. Математик эксперимент оддий математик моделлаштиришдан яна шуниси билан фарқ қиласиди, уни ўтказиш чоғида моделларнинг ҳар хил варианatlари текширилади, яъни моделлар устида эксперимент амалга оширилади.

Математик эксперимент компьютерда моделлаштирилса, иқтисодий экспериментларни қулай, сифтли ва арzon ўтказишга имкон яратилади. Бундай эксперимент, қандайдир хўжалик жараёнларини баён қилувчи бошқа иқтисодий моделларга қараганда, амалда қўллаш учун анча самарали ва универсал, яъни кўп варианти ва кўп моделли хусусиятга эга. Шунингдек, у анча осон бошқарилади, унинг натижаларини таҳлил қилиш, талқин қилиш ва тушунириш соддароқ. Бундай иқтисодий эксперимент кўп вақт ва жой талаб қилмайди, хусусан, замонавий шахсий компьютерига эга бўлган ҳар қандай иқтисодчи-математик уни ўзи мустақил ўтказиши мумкин.

Иқтисодиёт илмида математик методни қўллашнинг асосий йўналишлари батафсил муҳокама қилинганидан сўнг, эҳтимол, қуйидаги масалага тўхталиш ва саволларни қўйиш

зарур: иқтисодиёт фанларидаги барча методлар тизимида математик методнинг ўрни қандай? Агар уни алоҳида(ажралган) холда эмас, балки тизимли, яъни бутун математик методология ривожланишининг элементи сифатида ўрганадиган бўлсак, у иқтисодий билимларни ривожлантириш учун қандай аҳамиятга эга?

Бу саволга қуйидагича жавоб бериш мумкин: *Математик метод иқтисодиёт фанларини шаклга келтиришига, унинг кўплаб муаммоларини математик ўлчовлар, таққослилар ва счетлар тилига ўтказишга имкон яратиб, у иқтисодиёт фанларини ўз далиллари тизими ва методлари бўйича табиии фанлар билан таққосанадиган қилди, у иқтисодиёт фанларини номатематик, сифат методлари самарасиз ишилаётган соҳаларда соддароқ йўллар билан кўплаб ижобий натижаларга олиб келиши лаёқатига эгалигини кўрсатди.*

Лекин, бари бир ҳам, математик методнинг аҳамиятини иқтисодий тадқиқотларнинг бошқа методлари орасида ошириб юбориш керак эмас. Математик метод ва иқтисодий билимларни математикалаштириш иқтисодиёт назариясининг, асосан унинг сифат жиҳати бўйича, ўрнини боса олмайди; ва энг асосийси, математик метод муайян иқтисодий назарияни эмпирик йўл билан асослаб бера олмайди, у фактат буни соддалаштириши мумкингина халос.

Демак, иқтисодиёт илмида математик метод қарор топган аксиома ёки шарт-шароитлардан тўғри хulosалар чиқаришгагина имкон беради, хўжалик фактларининг мавжудлиги ёки йўқлигини, иқтисодий назариялар ва гипотезаларнинг ҳақиқийлиги ёки соҳталигини эса, умуман, далиллай олмайди. Аммо, афсуски, иқтисодчилар,

хусусан иқтисодчи-математиклар орасида, математик методнинг иқтисодий тадқиқотлардаги аҳамияти тўғрисида тасаввурни ошириб кўрсатиш кенг тарқалган. Юкорида баён қилинганларнинг барчаси ушбу мавзудаги сухбатимизни давом эттиришга ва кейинги параграфда иқтисодий тадқиқотларда математик методларнинг камчиликлари тўғрисидаги масалани муҳокама қилишга имкон беради.

Математик метод ўзининг юкорида баён қилинган кўплаб афзалликларига қарамасдан, уни ҳаддан ташқари кўп кўллаганда қатор камчиликларга ҳам йўл қўйилади. Бу камчиликлар кўплаб тадқиқотчиларнинг ишларида таҳлил қилинган ва бундай таҳлил иқтисодиёт фанларига нисбатан ҳам ўринлидир. Математик методнинг бундай зайд томонларини тўртта асосий гурухга бўлишимиз мумкин:

1) иқтисодий тадқиқотларда математик методнинг биринчи камчилиги шу билан боғлиқки, ушбу метод иқтисодиётдаги сифат жараёнларини тўлиқ қамраб олаолмайди ва баён қила олмайди, шунингдек уларни тушунтириб ҳам бера олмайди;

2) математик методнинг иккинчи камчилиги шундан иборатки, у ўзининг мураккаблашган математик аппарати туфайли бошқа фанлар, хусусан гуманитар ва ижтимоий фанларнинг вакиллари қабул қилинишини жуда қийинлаштиради;

3) математик методнинг учинчи камчилиги шундан иборатки, у иқтисодиёт фанларини виртуал маконга кўчиради ва уни эмпирик заминидан узиб қўяди.

4) математик методнинг тўртинчи камчилиги шунда намоён бўладики, у иқтисодиётнинг амалий муаммоларини

ҳал этишга яхши ёрдам бера олмайди ва соғлом фикр даражасида самарасиз ишлайди.

Математик методнинг иқтисодий тадқиқотлардаги роли ва аҳамиятини муҳокама қилиш натижаларини умумлаштириб, баён қилинган фикр-мулоҳазаларимизни қувватлантириш учун инглиз табиатшунос олими Т. Хаксли»[7]нинг бу ҳақдаги фикридан иқтибос келтирамиз: «Математика, тегирмонга ўхшайди, унга нима солинса, шуни янчади, унга шўра (олабўта) (донини – Д.Р.) солиб, буғдой унини олиб бўлмайди, яъни саҳифаларни формулалар билан тўлдирганингиз билан, Сиз сохта фаразлардан ҳақиқатни олаолмайсиз»»[2].

Ушбу таъкидлашни ҳар бир иқтисодчи эсда тутиши лозим. Афсуски, айрим тадқиқотчилар иқтисодиёт илмининг асосларини яхши билмасдан, математик инструментарийни маълум даражада ўзлаштириб, ҳатто математика бўйича таянч маълумотга эга бўлсада, иқтисодиёт фанларида янги илмий назария, гипотезалар ва кашибиётлар яратади. Ҳатто, айрим ҳолларда, узундан-узоқ, ўта мураккаб, кўпчиликка тушунуксиз, тадқиқот мавзуси, предмети ва методлари билан боғланмаган, фойдасиз ва ўринсиз формулалар асосидаги ҳисоб-китоблар келтирилади.

Хулоса. Мавзуга оид изланишлар натижалари умумлаштирилиб, қуйидаги хулосалар шакллантирилди:

1. Математик методни иқтисодиёт илмига татбиқ этишнинг асосий йўллари иқтисодий билимларни шаклан ва математик ифодалаш ҳисобланади. Иқтисодий билимларни *шаклан ифодалаш* методини хўжалик жараёнлари ва ҳодисаларининг тузилмасини очиб бериш ва акс эттиришга асосланган метод, шунингдек,

бундай жараёнлар (ёки ходисалар) мазмунини абстракт символ(рамз)лар ва белгилар орқали ифодалайдиган метод деб ҳам таърифлашимиз мумкин. Иқтисодий билимларни математикалаштириши – бу хўжалик фактларини шаклан ифодалашининг ўлчаш, таққослаш ва ҳисоблаш амалларига асосланган маҳсус методи.

2. Замонавий иқтисодиёт илмида математик методлар ривожланишининг бир қанча асосий йўналишлари мавжуд: иқтисодий жараёнларни математик моделлаштириш, математик иқтисодиёт, эконометрика, оптимал бошқарув методлари ва методологияси, ўйинлар назарияси, иқтисодий кибернетика. Шунингдек, математик экспериментга ҳам алоҳида эътибор қаратилиши зарур. Чунки, бу метод назарий ва эмпирик

билиш методларини ўзида муваффақиятли бирлаштиради.

3. Математик методнинг асосий камчиликларига қўйидагиларни киритишими мумкин: а) иқтисодиётдаги сифат жараёнларини қамраб ола олмаслиги; б) бошқа фанларнинг вакиллари томонидан тушуниш қийинлиги; в) иқтисодий билимларнинг «виртуал макон»га ўтиб кетиши; г) соғлом фикр ва кундалик ҳаётий тажриба даражасида ишлашга лаёкатсизлиги.

4. Якуний хулоса шундан иборатки, иқтисодиёт илмини математикалаштиришда, уни чигаллаштирмаслик, мавхум, ҳатто шубҳали, амалий ҳаётдан узилиб қолган соҳта илмкашликка айлантирмаслик керак.

ФОЙДАЛАНИЛГАН АДАБИЁТЛАР РЎЙХАТИ

1. Ш.Мирзиёев. Ризқ-рўзимиз бунёдкори бўлган қишлоқ хўжалиги ходимлари меҳнатини улуғлаш, соҳа ривожини янги босқичга кўтариш-асосий вазифамиздир. <https://staff.tiame.uz/storage/users>.
2. Айвазян С.А. Основы эконометрики. Т. 2. М., 2001.
3. Орехов А.М. Методы экономических исследований: Учеб. пособие. М.: ИНФРА-М, 2009. -392 с
4. Рузавин Г.И. Математизация научного знания. М. «Мысль», 1984. 208 с.
5. Ўзбекистон миллий энциклопедияси. 5-жилд. «Ўзбекистон миллий энциклопедияси» Давлат илмий нашриёти, 2003. – 704 б.
6. Ўзбекистон миллий энциклопедияси. 10-жилд. «Ўзбекистон миллий энциклопедияси» Давлат илмий нашриёти, 2005. – 656 б.
7. Томас Генри Гексли (ёки Хаксли, англ. Thomas Henry Huxley), <https://ru.wikipedia.org/wiki>
8. <https://infourok.ru/proektnaya-rabota-po-matematike-na-temu-matematika-v-ekonomike-vypolnila-tamara-lajanova-uchenica-8-a-klassa,4216390.html>;